



Caderno da crítica

Cuestionario Proust: Xosé Iglesias

[Ramón Nicolás 26 Febreiro 2015](#)

1.– Principal trazo do seu carácter?

– Traballador, honesto e esixente.

2.– Que calidade aprecia máis nas persoas?

– A lealdade e a honradez.

3.– Que agarda das súas amizades?

– Que me aprecien o mesmo que eu a elas.

4.– A súa principal eiva?

– Un punto de intolerancia.

5.– A súa ocupación favorita?

– Construír barcos no meu estaleiro e versos no tempo libre.

6.– O seu ideal de felicidade?

– Ollar como morremos todos de velliños despois de vivir unha vida plena.

7.– Cal sería a súa maior desgraza?

– Perder a algún familiar próximo supoño.

8.– Que lle gustaría ser?

– Non aspiro a ser máis do que son, chégame o que teño, eso si, que non mo rouben.

9.– En que país desexaría vivir?

– No centro do mar, nunha nación chamada Galiza.

10.– A súa cor favorita?

– Todas, cada unha delas nunha situación diferente.

11.– A flor que máis lle gusta?

– Non son de frores, escollo a rosa (dos ventos).

12.– O paxaro que prefire?

– Pola súa maxestosidade, e sobre todo pola cor dos seus ollos, o mascato.

13.– A súa devoción na prosa?

– Se falan do mar, escollos a todos.

14.– E na poesía?

– Un ou dous poemas de cada poeta, aínda que me emocionan moito os poemas de Manuel Antonio, ou Antón Avilés.

15.– Un libro?

– Merqueino con 16 anos e acompañoume en moitas ocasións: *Costa de la muerte, historia y anecdotario de sus naufragios*, de Jose Baña Heimn.

16.– Un heroe de ficción?

– O capitán Nemo.

17.– Unha heroína?

– Como homenaxe a Begoña Caamaño , quédome coa súa *Morgana*.

18.– A súa música favorita?

– Toda a música folk da Galiza, sen excluír a ninguén. Teño devoción tamén por Yann Tiersen.

19.– Na pintura?

– Enchería toda a miña casa de cadros de Viki Rivadulla, a pintora do mar.

20.– Un heroe ou heroína na vida real?

– Os patróns de pesca, e os mariñeiros, que arriscan as súas vidas a diario para que a xente poida comer peixes salvaxes. O mesmo as mulleres da nosa terra que nos axudaron e moito a erguer esta nación.

21.– O seu nome favorito?

– César, que me ronda pola cachola moi moi a miúdo (así se chama o meu pequeno).

22.– Que hábito alleo non soporta?

– A prepotencia.

23.– O que máis odia?

– A crueldade.

24.– A figura histórica que máis despreza?

– Quizais e ollando a historia a través dos séculos, todos aqueles que impuxeron a súa ideoloxía sobre o resto e por iso mataron a moitos seres inocentes, os ditadores en xeral.

25.– Un feito militar que admire?

– No pobo veciño de Portugal, a histórica revolución dos cravos.

26.– Que don natural lle gustaría ter?

– Saber tocar un instrumento musical facilmente (cousa que me é imposible).

27. – De que maneira lle gustaría morrer?

– Sexa cando sexa o momento, sen sufrir moito.

28.– Cal é o seu estado de ánimo máis habitual?

– Cabreadísimo con estes políticos que están roubando o noso mar descaradamente.

29.– Que defectos lle inspiran máis indulxencia?

– Non me molestan demasiado as pequenas mentiras.

30.– Un lema na súa vida?

– Vive tranquilo e deixa vivir en paz os que te rodean.